

# Ablif?

E dianan aki nos ta ku man na kabes pasobra e area di Karibe ta esun di dos mas infektá ku e viro HIV (despues di Afrika) for di kua ta haña AIDS. Na e mesun tempu ta sali den korant un mensahe pa kombatí AIDS: “Hasie dushi si...pero hasie seif”.

Ablif? **Mensahenan asina ku nèt loke ta PROMOVÉ mas infekshon di AIDS?** Mi tin dos problema ku esaki. 1) E mensahe aki klaramente ta enkurashá hende pa “hasie”. E motibu prinsipal ku tin tantu problema ku AIDS (i hopi otro malesa transmití seksualmente [MTS]) **ta nètamente pasobra tantu hende ta “hasie”**. 2) E mensahe aki ta enkurashá hende pa hasi uso di un protekshon defektuoso!

Kondon a ser inventá pa usa komo un antikonseptivo. Kon efektivo e ta riba e tereno ei? Segun revista di Famia Plania, *Family Planning Perspectives*, di mil pareha ku ta usa kondon pa prevení embaraso, den un aña 157 di nan lo por sali na estado.

Un dama por sali na estado solamente dos pa tres dia den luna. Pues den un aña, e máksimo chèn ku e tin di sali na estado ta 36 dia. Maske ta 36 dia so, tòg 157 di kada mil hende muhé ku ta **usa kondon** lo keda embarasá!

Si kondon ta tan inefektivo kontra embaraso—e proposito prinsipal di kondon—kiko ta e kaso usando kondon komo protekshon kontra MTS—**loke no ta su proposito?** Si bo partner seksual tin un enfermedat venérikò, ta pusibel pa kontagiá e enfermedat di bo partner **tur dia di e 365 dia den aña!** Si kondon ta faya tantu komo protekshon kontra embaraso, sin duda e ta frakasá muchu mas komo un protekshon kontra enfermedat ku bo por kontagiá kualke dia den aña!

Ta kalkulá ku 9 biòn kondon ta usá kada aña na mundu. Tòg e epidimia di AIDS i otro MTS ta eskalá fo’i kontrol. Pakiko?

Ora a studia e hanskun di latèks ku sirugano ta usa pa hasi operashon (e mésun material for di kua kondon ta trahá), nan a deskubrí buraku di grandura di 5 mikron ku a penetrá e densidat di e hanskun. E víro ku ta kousa AIDS ta midi solamente 0,1 te 0,3 mikron—**50 bes mas chikitu ku e buraku di 5 mikron. Anto nos ta promové kondon komo un protekshon “seif” kontra enfermedatnan ku por ta fatal?**

Kiko e “ekspertonan” ku sa di kondon mes ta bisa? Na un konferensia, a hasi e 800 eksperto di sèks ku tabata presente e pregunta, kuantu di nan lo konfia un kondon pa nan propio protekshon durante relashon seksual ku un persona ku nan sa ta HIV positivo. Ningun...**NI UN**...a hisa man. Tòg e mesun hendenan ta enkurashá nos pa “Hasie dushi si... ma hasie seif”!

Dòkter Robert R. Redfield, e investigadó prinsipal di e víro HIV pa ehersito merikano na Walter Reed Institute of Research, a deklará: “Mi a papia literalmente ku miles di dòkter. Mi a hasi nan e pregunta dirèkt, ‘Médikamente, bo ta rekomendá pa un pashènt ku ta infektá (ku HIV) tene relashon seksual, usando un kondon, ku un pèrsona ku no ta infektá?’ Nunka mi a enkontrá un médiko ku ta rekomendá esei.”

Si ekspertonan ta deskonfia kondon, dikon nos si mester konfia un pida di latèks komo un armadura efektivo kontra enfermedatnan horibel? Ta kruel pa enkurashá nos yunan presioso pa konfia algu ku ekspertonan mes no ta konfia!

“Hasie dushi si...pero hasie seif.” Ablif? Echu ta ku den nos era e dos frasenan ei ta kontradisí otro. **Nan ta bèrdat solamente den e konteksto di matrimonio!**

**Nos Kreador ku ke nos bon!** E ke yuda nos evitá hopi problema, enfermedat, i asta morto. E sa di e konsekuensianan di sèks fuera di matrimonio. Ta pesei mes E ta bisa “*Hui for di inmoralidat...e hende inmoral ta peka kontra su mes kurpa*” (1 Korintionan 6:18). Ta pasobra E ke nos bon, nos Kreador **NO** a bisa, “Hasie dushi si...pero hasie seif”.